

Na osnovu stava (3) člana 91. Zakona o obrtu i srodnim djelatnostima ("Službene novine Federacije BiH", broj 35/09) i čl. 134. i 135. Zakona o upravi u Federaciji BiH ("Službene novine Federacije BiH", br.: 28/97 i 26/02), federalni ministar razvoja, poduzetništva i obrta d o n o s i

P R A V I L N I K

o izornoj proceduri u obrtničkim komorama kantona i Obrtničkoj komori Federacije BiH

POGLAVLJE I – OSNOVNE ODREDBE

Član 1. (Sadržaj)

Pravilnikom o izornoj proceduri u obrtničkim komorama kantona i Obrtničkoj komori Federacije BiH (u daljem tekstu: pravilnik) propisani su: vrijeme izbora, koordinator izbora i izborna komisija, izorno područje, raspodjela predstavnika u skupštini obrtničke komore, izborni prijedlozi, izbori, uži izbor kandidata, žalbeni postupak i troškovi provođenja izbora u obrtničkim komorama kantona i Obrtničkoj komori Federacije Bosne i Hercegovine (u daljem tekstu: obrtničke komore) .

POGLAVLJE II – VRIJEME IZBORA, KOORDINATOR IZBORA I IZBORNA KOMISIJA

Član 2. (Period izbora)

- (1) Izbori za predstavnike u obrtničkim komorama (u daljem tekstu: izbori) redovno se organizuju svake 4 (četiri) godine.*
- (2) Izbori se mogu organizovati i u vanrednim slučajevima, ako je to propisano statutom obrtničke komore kantona ili Statutom Obrtničke komore Federacije Bosne i Hercegovine.*

Član 3. (Dan i vrijeme izbora)

- (1) Upravni odbor obrtničke komore određuje dan izbora i vrijeme izbora.*
- (2) Izbori se u pravilu održavaju nedjeljom ili praznikom, odnosno neradnim danom.*

Član 4. (Koordinator izbora)

Upravni odbor obrtničke komore, kao svog predstavnika, imenuje Koordinatora izbora, koji u skladu sa čl. 73. i 74., te stavom (2) člana 91. Zakona o obrtu i srodnim djelatnostima (u daljem tekstu: zakon), nema glasačko pravo i koji ne smije biti službenik obrtničke komore.

Član 5. (Izborna komisija, obaveze i prava članova)

- (1) Upravni odbor obrtničke komore, od ukupnog broja članova sa glasačkim pravom, imenuje četiri člana i potreban broj njihovih zamjenika, od kojih polovina moraju imati glasačko pravo u skladu sa članom 4. ovog pravilnika.*
- (2) Koordinator izbora i imenovani članovi sačinjavaju Izbornu komisiju, kojom predsjedava Koordinator izbora.*
- (3) Izborna komisija može odlučivati kada su, osim Koordinatora izbora ili njegovog zamjenika, prisutna još najmanje dva člana imenova u skladu sa članom 4. ovog pravilnika. Izborna komisija odlučuje većinom glasova, a u slučaju izjednačenog broja glasova odlučuje glas Koordinatora izbora.*
- (4) Članovi i zamjenici Izborne komisije obavezuju se Koordinatoru izbora na vanstranačko i savjesno obavljanje svojih zadataka, kao i na čuvanje svih podataka koji im budu dostupni u toku obavljanja njihovog posla, a posebno na čuvanje tajne o izbornim rezultatima.*
- (5) Zamjenik se angažuje u odsutnosti člana ili u slučaju njegovog opoziva.*
- (6) Član Izborne komisije nema pravo na novčanu naknadu. Njemu se nadoknađuju novčani troškovi i troškovi izgubljenog vremena u visini koju odrede članovi skupštine obrtničke komore.*

Član 6. (Zapisničar Izborne komisije)

- (1) Na sjednicama Izborne komisije Koordinator izbora imenuje zapisničara koji se obavezuje na vanstranačko i savjesno obavljanje dužnosti.*
- (2) Zapisničar nema glasačko pravo i ne pripada članovima sa glasačkim pravom u skladu sa članom 4. ovog pravilnika.*

Član 7. (Sjednice Izborne komisije)

- (1) Mjesto i vrijeme sjednica Izborne komisije određuje Koordinator izbora. Članovi i zapisničar pozivaju se na sjednice.*
- (2) Izborna komisija odlučuje na javnim sjednicama.*

- (3) Sjednice su javne kada je ranijim oglasom na ulazu zgrade u kojoj se održavaju sjednice oglašeno vrijeme, mjesto i predmet sjednice, uz uputstvo da je dozvoljeno prisustvovanje članova skupštine sa glasačkim pravom.

POGLAVLJE III – IZBORNO PODRUČJE I RASPODJELA PREDSTAVNIKA U SKUPŠTINI OBRTHNIČKE KOMORE

Član 8. (Izorno područje)

Područje koje obuhvata kanton predstavlja izorno područje obrtničke komore kantona, a područje Federacije Bosne i Hercegovine izorno područje Obrtničke komore Federacije Bosne i Hercegovine.

Član 9. (Raspodjela predstavnika)

U cilju raspodjele mandata predstavnika u skupštini, obrtničke komore mogu svojim statutima propisati podjelu predstavnika u grupe u skladu sa članom 90. stav (2), odnosno članom 103. stav (2) zakona.

POGLAVLJE IV – IZBORNI PRIJEDLOZI

Član 10. (Prikupljanje izbornih prijedloga)

Koordinator izbora najkasnije 3 (tri) mjeseca prije dana izbora, objavljenog od strane nadležnih organa obrtničke komore, treba zatražiti predaju izbornih prijedloga i nakon njihovog prikupljanja objaviti ih na oglasnoj ploči obrtničke komore i u najmanje jednim dnevnim novinama.

Član 11. (Sadržaj izbornih prijedloga)

- (1) Izborni prijedlozi važe za izorno područje.
- (2) Izborni prijedlozi su odvojeni za izbor predstavnika obrtnika koji obavljaju vezane i posebne obrte, predstavnika obrtnika koji obavljaju tradicionalne i stare zanate i predstavnika lica koja obavljaju srodne djelatnosti.
- (3) Broj kandidata za izbor predstavnika obrtnika koji obavljaju vezane i posebne obrte, predstavnika obrtnika koji obavljaju tradicionalne i stare zanate i predstavnika lica koja obavljaju srodne djelatnosti mora, u skladu sa članom 8. ovog pravilnika, odgovarati odredbama propisanim statutom obrtničke komore.
- (4) Izborni prijedlozi dostavljaju se u obliku lista i moraju sadržavati onoliki broj imena kandidata, koliko se članova i zamjenika bira u izbornom području.

Član 12.
(Kandidati iz izbornih prijedloga)

- (1) Kandidati za člana (predstavnik) ili zamjenika člana (predstavnik) u skupštini moraju dati tačne slijedeće podatke:
- a) ime,
 - b) prezime,
 - c) zanimanje,
 - d) mjesto stanovanja i
 - e) tačnu adresu,
- tako da ne postoji nikakva sumnja ili zabuna u identitet kandidata.
- (2) Iz izbornih prijedloga jasno se mora vidjeti ko je predložen za člana, a ko za zamjenika.
- (3) Kod predlaganja dva zamjenika, u prijedlogu se mora tačno naznačiti ko je predložen za prvog, a ko za drugog zamjenika, i to tako da ne postoji nikakva sumnja ili zabuna u redoslijed kandidata za zamjenike.

Član 13.
(Potpisnici izbornih prijedloga)

- (1) Svaki izborni prijedlog mora biti potpisan od najmanje dvostrukog broja obrtnika ili lica koja obavljaju srodne djelatnosti u odnosu na broj mjesta koja oni zauzimaju u skupštini obrtničke komore.
- (2) Potpisnici izbornog prijedloga moraju prilikom potpisivanja pored imena i prezimena navesti i svoje zanimanje, mjesto i adresu stanovanja, a njihovi potpisi moraju biti čitki.

Član 14.
(Dostavljanje izbornih prijedloga)

Izborni prijedlozi moraju biti dostavljeni Koordinatoru izbora najkasnije 30 (trideset) dana prije oglašenog dana izbora.

Član 15.
(Prilozi uz izborne prijedloge)

Sa svakim izbornim prijedlogom mora se dostaviti:

1. Izjava kandidata da je saglasan sa stavljanjem njegovog imena na izborni prijedlog,
2. Potvrda obrtničke komore da kandidat ispunjava uslove:
 - a) ako se radi o obrtniku, u smislu člana 16. stav (1) zakona,
 - b) ako se radi o licu koje obavlja srodnu djelatnost, u smislu člana 48. stav (2) zakona.

3. *Potvrda obrtničke komore da su potpisnici izbornog prijedloga članovi obrtničke komore.*

Član 16.
(Neispravnost izbornih prijedloga)

Ako izborni prijedlozi imaju nedostatka, Koordinator izbora dužan je otkloniti uočene nedostatke, u saradnji sa potpisnicima izbornih prijedloga.

Član 17.
(Prihvatanje izbornih prijedloga)

- (1) Izborna komisija odlučuje o prihvatanju izbornih prijedloga najkasnije 21 (dvadeset i jedan) dan prije izbora.*
- (2) Ako izborni prijedlozi nisu u skladu sa odredbama ovog pravilnika ili nisu ispoštovani propisani rokovi za njihovo podnošenje novi izborni prijedlozi ne mogu se prihvatiti.*
- (3) Nakon što se utvrde svi izborni prijedlozi oni se naknadno ne mogu mijenjati.*

Član 18.
(Objavljivanje izbornih prijedloga)

- (1) Koordinator izbora, u skladu sa članom 10. ovog pravilnika, objavljuje prihvaćene izborne prijedloge najkasnije 15 (petnaest) dana prije izbora. O prihvaćenim izbornim prijedlozima obrtnička komora ima potrebne informacije u propisanoj formi, ali bez imena potpisnika.*
- (2) Svakom izbornom prijedlogu dodjeljuje se redni broj i šifra, po čemu se oni međusobno razlikuju.*

POGLAVLJE V – IZBORI

Član 19.
(Birački spiskovi)

- (1) Glasati može samo onaj koji je upisan u birački spisak.*
- (2) Uvid u biračke spiskove dozvoljen je samo licima sa pravom glasa.*
- (3) Ako lice iz stava (2) ovog člana smatra birački spisak nepotpunim i netačnim ima pravo žalbe, pismenim putem, nadležnim službama obrtničke komore, u roku od 5 (pet) dana od dana objavljivanja biračkog spiska.*
- (4) Odluku po žalbi Koordinaciona izborna komisija mora donijeti prije izbora i o toj odluci se obavještavaju učesnici izbora.*
- (5) Ako je rok za donošenje odluke istekao, glasač može glasati samo ako je blagovremeno uložio žalbu. U protivnom se briše sa biračkih spiskova.*

- (6) *Ako dođe do ispravke biračkih spiskova, razlozi za ispravku navode se u kolonu " PRIMJEDBE - NAPOMENE ". Sve promjene se unose kao naknadni unos.*
- (7) *Birački spiskovi se ažuriraju do samog dana izbora.*
- (8) *Birački spiskovi se nakon izbora predaju Koordinatoru izbora.*

Član 20.
(Pravo glasa)

- (1) *Glasati mogu samo lica koja imaju glasačko pravo u skladu sa članom 4. ovog pravilnika i koja su legitimisana.*
- (2) *Ako je obrtnik ili lice koje obavlja srodnu djelatnost, u skladu sa čl. 44. i 54. zakona, privremeno obustavio obavljanje djelatnosti, glasati može samo uz predočavanje rješenja nadležnog organa o privremenom obustavljanju obavljanja djelatnosti.*
- (3) *Glasači koji ne mogu prisustvovati glasanju nemaju pravo poslati zamjenu, niti glasati pismenim putem.*

Član 21.
(Glasački listići)

- (1) *Uz prethodnu saglasnost Upravnog odbora obrtničke komore, glasačke listiće sastavlja Koordinator izbora prema prihvaćenim izbornim prijedlozima, označava određenim rednim brojem i šifrom i dostavlja nadležnim organima obrtničke komore.*
- (2) *Na izborima se mogu upotrijebiti samo glasački listići dostavljeni od nadležne službe obrtničke komore.*
- (3) *Svi glasački listići izdati od Izborne komisije označeni su važećim rednim brojem i uvode se u zapisnik.*
- (4) *Glasački listići za izbore pripremaju se u različitim bojama.*
- (5) *Glasački listići se nakon zaokruživanja pakuju u kovertu označenu pečatom obrtničke komore.*

Član 22.
(Važeći glasački listići)

U proceduri izbora važeći su samo oni glasovi koji su zaokruženi na neizmijenjenim glasačkim listićima i predati Izornoj komisiji.

Član 23.
(Glasačko mjesto)

- (1) *Stol Izborne komisije mora biti dostupan sa svih strana.*
- (2) *Na stolu se postavljaju tri odvojene glasačke kutije i to jedna za glasačke listiće obrtnika koji obavljaju vezane i posebne obrte, druga za glasačke listiće obrtnika*

koji obavljaju tradicionalne i stare zanate i treća za glasačke listiće lica koja obavljaju srodne djelatnosti.

- (3) Prije početka glasanja Izborna komisija provjerava da li su glasačke kutije prazne.*
- (4) Glasačke kutije ne smiju se otvarati do završetka izbora.*
- (5) Glasačkih listića i koverti mora biti u dovoljnom broju, a određen broj i u rezervi.*

Član 24. (Procedura glasanja)

- (1) Svi koji imaju pravo glasa mogu ući u prostorije gdje se odvija glasanje. U tim prostorijama ne smiju se držati nikakvi govori.*
- (2) Izborna komisija odstranjuje iz prostorija gdje se odvija glasanje sva lica koja uzrokuju ometanje rada, red i mir, a ako se radi o glasaču omogućava mu se da ispunji svoje glasačko pravo prije odstranjivanja.*
- (3) Predsjedavajući Izborne komisije kontroliše proceduru glasanja i uspostavlja red u slučajevima gužve na ulazu u prostorije gdje se odvija glasanje.*
- (4) Pri ulasku u prostorije gdje se odvija glasanje, glasač dolazi do stola Izborne komisije, govori svoje ime i prezime, po zahtjevu i adresu, i ukoliko ga zapisničar pronađe u biračkom spisku i potvrdi njegove podatke, dobiva kovertu i glasački listić. Na zahtjev Izborne komisije glasač mora pokazati lični dokument.*
- (5) Predsjednik izborne komisije vodi računa da svi glasači dobiju službene listiće i da ih niko ne ometa pri glasanju na mjestu za glasanje.*
- (6) Član Izborne komisije kojeg odredi predsjedavajući Izborne komisije daje sve potrebne informacije glasaču, kako bi ga uputio u ispravan način glasanja.*
- (7) Glasač sa glasačkim listićem odlazi na mjesto za glasanje, gdje je onemogućeno prisustvo drugih lica i obavlja svoju glasačku dužnost.*
- (8) Glasači se imaju pravo zadržati na mjestu za glasanje onoliko vremena koliko im je potrebno da odluče za koga će glasati.*
- (9) Poslije glasanja glasač dolazi do stola Izborne komisije i ubacuje svoj glasački listić u odgovarajuću glasačku kutiju, ovisno o vrsti djelatnosti kojom se bavi.*
- (10) Glasačke listiće, predate u glasačkim kovertama bez određenog broja ili pečata obrtničke komore odstranjuje predsjednik Izborne komisije.*
- (11) Nakon vremenskog roka određenog za glasanje, lica koja u tom vremenu nisu uspjela glasati, a zatekla su se u prostoriji gdje se odvija glasanje, mogu ostati i obaviti glasačku dužnost. Tek nakon tog predsjednik Izborne komisije može proglasiti glasanje zatvorenim.*

Član 25. (Zapisnik o izbornom procesu)

Po završetku glasanja Izborna komisija je dužna obavijestiti Koordinatora izbora o toku izbornog procesa prilažući zapisnik o izbornom procesu.

Član 26.
(Nevažeći glasački listići)

- (1) *Glasački listići su nevažeći:*
- a) ako nisu izdati od nadležne službe obrtničke komore;*
 - b) ako se ne nalaze u koverti sa pečatom ili ako nemaju određenu šifru;*
 - c) ako im je šifra neprepoznatljiva;*
 - d) ako je koverta priložena bez glasačkog listića.*
- (2) *Ako se u koverti nalazi više listića smatrat će se jednim glasom ako su isti ili ako je samo jedan od njih važeći. U suprotnom se taj glasački listić proglašava nevažećim.*
- (3) *U zapisniku se moraju dati kratka objašnjenja zašto su listići važeći ili nevažeći.*
- (4) *Ako je glasački listić zbog neispravnosti koverta proglašen nevažećim, onda je i koverta nevažeća.*

Član 27.
(Važeći glasački listići)

- (1) *Važeći glasački listići pakuju se u papirnu kovertu osiguranu pečatom i zapisnički dostavljaju Koordinatoru izbora. On ih zadržava dok se ne potvrdi da su listići važeći.*
- (2) *U slučaju nepotvrđivanja ispravnosti glasačkih listića izbori se ponavljaju, a Koordinator izbora čuva glasačke listiće do donošenja takve odluke.*

Član 28.
(Rezultati izbora)

- (1) *Nakon što prikupi rezultate izbora sa svih glasačkih mjesta, Koordinator izbora saziva sjednicu Izborne komisije.*
- (2) *Na sjednici se raspravlja o svim izbornim izvještajima, donose konačni zaključci, a potom o svemu izvještavaju nadležni organi obrtničke komore, koji konačne rezultate objavljuju u javnosti.*
- (3) *Pobijedili su oni kandidati koji su dobili najveći broj glasova.*

POGLAVLJE VI – UŽI IZBOR

Član 29.
(Uži izbor)

- (1) *Ako predloženi kandidat za izbor ne dobije više od polovine glasova, vrši se uži izbor između 2 kandidata koji su dobili najviše glasova. U slučaju da oba kandidata dobiju isti broj glasova odlučuje se izvlačenjem koje organizuje Koordinator izbora na sastanku Upravnog odbora obrtničke komore.*
- (2) *Izbor kandidata se mora izvršiti u roku od 30 (trideset) dana od dana*

objavljivanja rezultata izbora od strane Koordinatora izbora. U tom slučaju nije potrebno podnošenje novih izbornih prijedloga.

POGLAVLJE VII – ŽALBENI POSTUPAK, TROŠKOVI IZBORA

Član 30. (Žalbe)

Žalbe o podjeli na izborna područja, imenovanju članova Izborne komisije i odluke o određivanju izbornih prostorija rješava Upravni odbor obrtničke komore.

Član 31. (Troškovi izbora)

Troškove izbora snose obrtničke komore.

POGLAVLJE VIII – ZAVRŠNE ODREDBE

Član 32. (Stupanje na snagu)

Ovaj pravilnik stupa na snagu narednog dana od dana objavljivanja u "Službenim novinama Federacije BiH".

*Broj : 08 – 02 – 363/09
Mostar, 15.07.2009. godine*

*MINISTAR
Velimir Kunić, s.r.*